

# REGLUR

## um ráðstöfun á verðmiðlunarfé til hagræðingar í mjólkuriðnaði og mjólkurframleiðslu.

### 1. gr.

#### Ráðstöfun verðmiðlunarfrjár.

Heimilt er að greiða allt að 200 milljónum kr. af verðmiðlunarfé, sem var ráðstafað til hagræðingar í mjólkuriðnaði og mjólkurframleiðslu samkvæmt c-lið í ákvæðum til bráðabirgða með lögum nr. 99/1993 um framleiðslu, verðlagningu og sölu á búvörum, til úreldingar mjólkurbúa, hagræðingarverkefna hjá mjólkurbúum og til búháttarbreytinga á jörðum með mjólkurframleiðslu sem liggja fjarri afurðastöð, samkvæmt nánari ákvæðum í reglum þessum.

### 2. gr.

#### Úrelding mjólkurbúa.

Fram til 1. september 1997 getur stjórn mjólkurbús sótt um styrk til úreldingar mjólkurbúsins, með eftirtöldum skilyrðum:

1. Mjólkurbúið verði úreld í heild og tryggt verði að eignin verði ekki tekin aftur í notkun til mjólkurvinnslu. Kvöð þar um skal þinglýst á viðkomandi fasteign.
2. Berist umsókn fyrir 1. desember 1996 getur styrkur orðið allt að 100% af bókfærðu verði fasteigna og véla.
3. Berist umsókn á tímabilinu frá 1. september 1996 til 1. september 1997 getur styrkur orðið allt að 75% af bókfærðu verði fasteigna og véla.

Þegar heimild landbúnaðarráðherra um að úrelða mjólkurbú liggur fyrir skal greiða styrk af verðmiðlunarfé fyrir eignir sem teknar eru til úreldingar. Styrkur skal nema hlutfalli skv. 2. eða 3. tl. af bókfærðu verði þeirra eigna, sem teknar eru úr notkun eins og þær voru skráðar í lok síðasta heila rekstrarárs sem mjólkurbúið starfaði að fullu. Heimilt er að endurmeta eignir til þess að samræma afskriftir, hafi mismunandi aðferðir verið notaðar.

Þær eignir sem teknar eru til úreldingar eru fasteignir og sérhæfður búnaður til mjólkurvinnslu. Lóð telst ekki til fasteignar í þessu sambandi. Bifreiðar teljast ekki til sérhæfðs búnaðar. Styrkur til úreldingar er ekki greiddur mjólkurbúi, sem er í greiðslustöðvun eða hefur verið tekið til gjaldþrotaskipta.

### 3. gr.

#### Hagræðing í mjólkuriðnaði.

Heimilt er að greiða styrki til mjólkurbúa vegna sérstakra verkefna til hagræðingar í mjólkuriðnaði. Heimilt er að styrkja samstarfsverkefni mjólkurbúa eða samruna. Styrkur má ná til þess hluta sérhæfðs búnaðar til mjólkurvinnslu sem verður óþarfur vegna samstarfsins og til kaupa á nýjum búnaði sem er nauðsynlegur við framkvæmdina.

Með styrkumsókn frá stjórn mjólkurbús skal fylgja áætlun um áformaða hagræðingu í rekstri sem sýni fram á að reikna megi með sparnaði er nemi á fimm ára tímabili eigi lægri upphæð en umbeðinni fjárhæð.

Nefnd skv. 5. gr. leggur mat á framkomnar umsóknir. Þegar heimild landbúnaðarráðherra um styrk til hagræðingar liggur fyrir skal greiða hann til viðkomandi mjólkurbúa, enda sé staðfest af trúnaðarmanni Framleiðsluráðs landbúnaðarins að hagræðingaraðgerðum hafi verið komið á.

## 4. gr.

**Styrkir til búháttabreytinga hjá  
mjólkurframleiðendum.**

Fram til 1. september 1997 geta eigendur og ábúendur á lögbýlum, sem liggja fjarri afurðastöð eða eru úrleiðis sótt um styrk til úreldingar á aðstöðu til mjólkurframleiðslu á lögbýlum, enda séu uppfyllt eftirfarandi skilyrði:

a. Staðsetning lögbýlis (lögbýla) lengi flutninga a.m.k. um 20 km að meðaltali miðað við verðlagsgrundvallarbú. Heimilt er að víkja frá þessari reglu í tilvikum þar sem flutningar eru erfiðir og dýrir.

b. Styrkur til úreldingar skal ná til fasteigna (fjóss og hlöðu) sem nýttar hafa verið til mjólkurframleiðslu og vélbúnaðar í þeim. Styrkur skal nema matsverði eigna og véla, sem metnar eru á sama hátt og greiðslur til leiguliða við ábúðarlök. Við úreldingu skal greiðslumark til mjólkurframleiðslu falla niður og er heimilt að bæta niðurfellinguna til að eðlilegar bætur komi fyrir þann aðstöðumissi sem verður til framleiðslu á jörðinni.

c. Tryggt verði að mjólkurframleiðsla verði ekki tekin upp á lögbýlinu, nema með sérstöku leyfi landbúnaðarráðherra. Kvöð þar um skal þinglýst á viðkomandi lögbýli.

Ákvæði þessarar greinar geta einnig tekið til lögbýla sem verða úrleiðis við úreldingu mjólkurbús. Umsóknir bænda um styrki til úreldingar skal taka til afgreiðslu í þeirri röð sem þeir berast. Ekki er skylt að verða við umsóknum sem berast eftir að fé þrýtur sem til ráðstöfunar er, sbr. 1. gr.

## 5. gr.

**Hagræðingarnefnd.**

Landbúnaðarráðherra skipar fimm manna nefnd sem metur umsóknir um styrki skv. reglum þessum. Skulu nefndarmenn skipaðir skv. tilnefningu Alþýðusambands Íslands, Bandalags starfsmanna ríkis og bæja, Framleiðsluráðs landbúnaðarins, Samtaka afurðastöðva í mjólkuriðnaði, en landbúnaðarráðherra skipar einn nefndarmanna, án tilnefningar og skal hann vera formaður nefndarinnar.

Hagræðingarnefnd metur umsóknir um styrki til úreldingar skv. reglum þessum og gerir skriflega samninga um úreldingu mjólkurbúa og búháttabreytingar hjá mjólkurframleiðendum. Í samningum um úreldingu mjólkurbúa skal kveðið á um sölumeðferð fasteigna og vélbúnað, sem samið er um úreldingu á, þ.m.t. þann tíma sem ætlaður er til markaðssetningar eignanna. Enn fremur skal kveðið á um hvernig staðið skuli að sölutilraunum eignanna. Í úreldingarsamningi skal kveðið á um lágmarksmarkaðsverð eigna. Beri sölutilraunir ekki árangur skal draga 50% af umsömdu lágmarksverði frá úreldingarstyrk. Við hugsanlega sölu eigna skal lækka umsáminn úreldingarstyrk sem nemur helmingi söluandvirðisins, að frádregnum sölukostnaði.

## 6. gr.

Reglur þessar eru settar í samræmi við tölulídi c í ákvæðum til bráðabirgða með lögum nr. 99/1993 um framleiðslu, verðlagningu og sölu á búvörum, sbr. breytingu með lögum nr. 147/1995 og öðlast þegar gildi og gilda til 1. janúar 1998.

*Landbúnaðarráðuneytinu, 18. mars 1996.*

**Guðmundur Bjarnason.**

*Jón Höskuldsson.*